

A2^r

Dem Fürnemen geler-
ten herren/ Sebaftian Renbold/ Saltz
burgifchem Secretarien/ wüncht Hie-
rouymus Ziegler feynen Grüß.

MJr ift nit vnwillfend/ in
fonder lieber Sebaftian/ mit
was gefchäftten deiner Con-
dition / du täglich beladen bift/
alfo das du yetzund die Edlen
kunft des Lateins/ vñ anders
gar verlaffen müßt/ vnd gleich allain die Barba-
ras literas tractiern/ Vrfach/ das nit ain yeder/
feinē luft vñ willen nach/ fein leben anrichten kan/
Sonder etwan auch/ wo zů er verordnet/ daffel-
big mit willen annemen/ vnd treyben müß. Nun
waißt du/ wie wir die Studia vnferer jugent erft-
lich anfangen/ auch im Alter lang geübt/ yetzund
aber gar in vngleichem wesen vnferer handtierüg
getelt. Noch bin ich deiner freündfchaft fo faft jn-
gedenck/ das ich von gantzem gmüt beger/ wo mit
mir müglich ift/ dir zů dienen. Schaw aber/ da ich
on gfahr vber difen dialogum Luciani kam/ gefiel
er mir fo faft/ das ich ain luft gewan/ vnnd den zů
Trausferieren für mich nam. Wölchē als er fertig

A ij was

A2^v

was/ gedacht ich gentslich dir zu schencken/ Nit
darumb/ das ich vermaint dir ain widergeltung
deiner freundschaft zuerfertigen/ oder aber dir
darmit ein Namen schöpffet/ weyl es ain schlecht
kain ding ist/ Sonder das du neben der schwere
deiner manigfaltigen geschäft zu zeyten etwas lä-
cherlichs/vnnd kurzweyligs zu lesen hettest. Ich
wayß auch wol/ das du solchen Dialogum in La-
tein zuuor nit ain mal gelesen haft/ Nichts deß-
minder hat es mir gefallen/ das in deinem namen/
auch denen/ die nit gelert seind/ bekañt werde/ was
die Allten zum thail von Boldergaytern gehalten
haben/Wölches/ so es dir ain luft/ vnnd du difes
mit guttem gemüt(wie ichs dann vermaint hab)
aufnimbt/ will ich mich mit der zeit dir zu Eeren
ains andern/ wills Gott/ vnterfthen. Hiemit
allzeyt was dir lieb ist. Datum Augspurg/
am andern Junij. im xlvi. Jar.